

HAGEO

(Aguéu)

**Tupana nüxna namaxã nacuãxãchi nax
naxügüaxüçax ya napata**

1 ¹Rü yexguma taxre ga taunecü
ãëxgacü yixixgu ga Daríu, rü norü
6 ga tauemaciärü ügügu, rü nüma ga
Cori ya Tupana rü norü orearü uruxü ga
Aguéuwa nidexa. Rü nüxna nanaxã ga
ore ga Yudáanecüãxarü ãëxgacü ga
Chorobabé ga Charatié nanecax ixixü rü
chacherdótegüärü ãëxgacü ga Yochué
ga Yochadá nanecax ixixü. ²⁻³Rü ñaa
nixí ga yema ore ga Aguéuwa nüxü
yaxuxü ga nüma ga Cori ya Tupana ya
guxüétüwa ngëxmacü, rü ñanagürü:
“Ñaa duüxügü rü nüxü nixugüe nax
taxüta nawa nanguxü nax wena
naxügüaxüçax ya chopata. ⁴¿Ëxna
pexicatama penaxwãxexü nax mexüne
ya ipatawa pemaxëxü, rü yoxni ya yima
chopata rü naxtapüx nügüétügu yixü
nax nachixexü? ⁵Rü chomax ya Cori ya
Tupana ya guxãétüwa ngëxmaxë rü
pemaxã nüxü chixu: iMea penangugü i
pecümagü! ⁶Rü pema rü muxüma i
penetü petogü natürü noxretama i norü
o pibuxgü, pechibüe natürü tama pexü
ningu, rü pexaxegü natürü

pitaxawaeama, rü pegü pidüxgü natürü
taguma penaiwe. Rü yíxema puracüxe
rü tanayauxtanü i tümaarü puracü
natürü paxama tüxü nagu erü ñoma
chacu irügáuxügu tananúcuxürüxü nixí.
⁷Rü choma ya Cori ya Tupana ya
guxãétüwa ngëxmaxë, rü pemaxã nüxü
chixu: iMea penangugü i pecümagü!
⁸iRü dauxchitawa pexí rü ngéma
mürapewa peyaxüx! iRü nua penana rü
ngëmamaxã wena penaxüx ya yima
chopata! Rü choma rü tá taãxëacü
ngéma changexma rü ngéma tá
ichanawëx i chorü üüne. ⁹Rü pemax rü
poraäcü pepuracüe nax pexü
nangexmaxüçax i muxü i perü
nanetüärü o, natürü noxretama nixí i
ngéma pibuxgüxü. Rü ngéma penetüärü
o i pechiügu namaxã penguxüxü rü
wüxi i cue ñaxümaxã ichayanatauxëxë.
¿Rü tüxcüü ngémaäcü nixí? Erü yima
chopata rü naxtapüxica nügüétü nayi
nax nachixexü rü pemax rü
pepataçaxica pexoégaãxë. Rü choma ya
Cori ya Tupana nixí i nüxü chixuxü i
ngéma. ¹⁰Rü ngëmacax nixí i tama
pexçax chanapuxëëxü rü ngéma
waixümü rü tama mea pexü nayaxëëãxü

i penetügü. ¹¹Rü choma nixĩ ga íchananguxẽẽxũ ga nax yapagüanexũ ga peanewa rü maxpúnegüwa, rü tríguncü, rü úbanecü, rü oríbunecü rü guxũma ga taxacü ga petogüxüñecüwa. Rü yema nax yapagüanexügagu rü pexçax ínangu ga taiya rü perü wocagüçax rü ta”, ñanagürü ga Tupana. ¹²Rü numa ga Chorobabé rü Yochué rü guxũma ga togü ga duũxũgü rü aixcuma Tupanaga naxĩñue yerü namuũe ga yexguma nüxũ naxĩñuegu ga yema ore ga Cori ya Tupana Aguéuwa nüxũ ixuxũ. ¹³Rü yexguma ga numa ga Aguéu ga Cori ya Tupanaarü orearü uruxũ, rü Cori ya Tupanaégagu duũxũgümaxã nidexa rü ñanagürü: “Numa ya Cori ya Tupana rü ñanagürü pexũ: ‘Choma ya Cori ya Tupana rü pexütawa changexma’”, ñanagürü. ¹⁴Rü yemaacü numa ga Cori ya Tupana rü nanataãxẽxẽxẽ ga Chorobabé ga Yudáanecüãxarü ãẽxgacü, rü Yochué ga chacherdótegüarü ãẽxgacü rü guxũma ga yema togü ga duũxũgü. Rü yexguma ga nümagü rü yema naxĩ rü inanaxügüe nax naxügüãxũ ga guma napata ga Cori ya Tupana ya guxãétüwa ngẽxmacü. ¹⁵Rü yexguma taxre ga taunecü Pérchiaarü ãẽxgacü yixĩxgu ga Daríu, rü meama norü 6 ga tauemacüarü (setiembre) 24 ga ngunexũ nixĩ ga inaxügüãxũ ga nax wena namexẽẽgüaxũ ga guma Tupanapata.

**Ngexwacaxũne ya
Tupanapata rü namexechi**

2 ¹Rü guma 7 ga tauemacü (octúbre) rü norü 21 ga ngunexũgu, rü numa ga Cori ya Tupana rü wenaxarü orearü

uruxũ ga Aguéumaxã nidexa. ²Rü nanamu nax Chorobabémaxã, rü Yochuémaxã, rü guxũma ga yema togü ga duũxũgümaxã nüxũ yaxuxũçax ga norü ore ga ñaxũ: ³“¿Texé i petanüwa rü nüxna cuaxächixũ ga nax nañuxraxũxũ ga chopata ga noxrix? Rü guma rü namexechi. Natürü ñuxma nax nüxũ pedauxũ rü taxuwama name. ⁴iNatürü nataãxẽ, Pa Chorobabé! iRü nataãxẽ, Pa Yochué ya Chacherdótegüarü ãẽxgacü! iRü petaãxẽgü Pa Guxũma i Duũxũgüx! iRü pora pexüe rü pepuracüe! Erü choma ya perü Cori ya Tupana rü pexütawa changexma. ⁵Rü yexguma Equítuanewa ínachoxũgu ga perü oxigü rü ichaxuneta rü ngẽma Chauãxẽ rü guxũgutáma pexũ naxümücü. Rü ngẽmacax taxuçaxma pemuũe i ñuxmax. ⁶⁻⁸Erü íxraxũ nataxu nax chanaxĩãxächixẽẽxũ i daxüguxũ i naane, rü ñoma i naane, rü ngẽma már, rü tá chanamuũexẽxẽ i guxũma i nachixũanegü. Rü ngẽma togü i nachixũanegüarü duũxũgü rü nua tá nanana i norü diërugü rü úirugü. Rü ngẽmaacü ya daa chopata rü tá namexechi. Rü choma ya Cori ya Tupana ya guxãétüwa ngẽxmaxẽ nixĩ i nüxũ chixuxũ i ngẽma erü choxrü nixĩ i guxũma i diërugü rü úirugü. ⁹Rü ñuxma nax wena namexẽẽxũ ya daa chopata rü yexguma noxri naxũxguarü yexera tá namexechi. Rü ngẽxguma rü tá ichayanaxoxẽxẽ i guxũma i nu i ñaa nachicawa, rü nua tá petaãxẽgü. Rü choma ya Cori ya Tupana ya guxãétüwa ngẽxmaxẽ nixĩ i nüxũ chixuxũ i ngẽma.

¹⁸⁻¹⁹Rü ñuxma daa taunecü rü norü 9
ya tauemacüarü (diciembre) 24 i
ngunexũgu nixĩ i ipenaxügüxũ nax
penanúcuxũ ya yima nutagü ya namaxã
inaxügüne ya chopata. iRü dücax, rü
mea penangugü! Rü woo i ñuxmax rü

nangearü oxõx i perü trígu, rü úbagü, rü
iguéragü, rü boxragü rü oríbugü, natürü
i ñuxmawena rü tá pexũ charüngüxẽẽ rü
tagutáma pexũ nataxu i ngẽma
penetüarü o”, ñanagürü ya Tupana.
.....